



Inatsisartut Suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

Misigissutsikkut ikiuigasuartarneq pillugu apeqquteqaat aallaavigalugu oqallinnissamik siunnersuut

(Inatsisartuni ilaasortaq Doris J. Jensen, Siumut)

Inuk kinaluunniit nappaammik toqussutaasinnaasumik sillimaffiginggisaminik eqqugaasinnaavoq. Taamatut eqqugaasut ilarpassuisa ikorneqarsinnaajunnaarlutik paasigaangamikku sukkasuumik piartuutigilertarpaat qujanartumilli aamma ilaqpurt iluarseqqissinnaanerminnik upperinnittunik aniguisartunillu.

Qaammatit marluk sinnerlugit Danmarkimi Kalaallit Peqqissartut Illuanni najugaqarninni paasivara, nappaassuarmik eqqugaasimallutik kalerritsittut pinasuartumik misigissutsikkut ikiorserneqarneq ajortut.

Kialluunniimmik takorloorsinnaavaa, nappaassuarmik eqqugaasimalluni imal. ikiorserneqarsinnaanani paasitinneqarsimalluni misigissutsikkut nakkarnassaqisoq ingammik kisimiilluni kalerritsissimagaanni.

Danmarkimi Kalaallit Peqqissartut Illuanni sulisut amerlasoorujussuupput ilai, peqqissaasuupput, ilai allaffimmiut, asaasut, igasut aammalu psykoterapeuteqarpoq namminerlu kajumissutsimik sulisoqarluni. Nalunngilara nammineq kajumissutsimik napparsimasunik oqaloqatiginnittartoqartoq kisianni taanna tarnip nakorsaanngilaq imal. allatut oqaloqatiginninnissamut ilinniarsimasuunani. Ajunngilluinnarpoq nammineq piumassutsimik sulisoqarmat kisianni isumaqarpunga, tamatigut kalerrisoqarsimatillugu ilinniarsimasumik misigissutsikkut ikorsiisinnaasumik sillimasoqartariaqartoq napparsimasumuunnaanngitsoq qanigisaasunullu ikorsiisinnaasumik. Assersuutigalugu ilinniartut psykologimik akeqanngitsumik oqaloqateqarsinnaatitaapput taamatuttaaq napparsimavimmi piaernerpaamik ikorsiisoqartarnissaa pisariaqarluarpoq. Tassami misigissutsit annertuumik aqutsisuusarput inuup ingerlariaqqinnissaanut, ilai iluarseqqissinnaanngitsutut naliligaasimasut allaat iluarseqqissinnaasarlutik tassungali killissagaanni misigissutsikkut tapersersorluarneqarnissaq pisariaqarluinnarpoq.

Taamaattumik apeqquteqaat aallaavigalugu oqallisissiatut siunnersuutigaara, nunaqqatigut nunatsinni nunattaluunniit avataani nappaammik eqqungaallutik kalerrinneqartut tamarmik



misigissutsikkut ikiorneqarnissamik neqeroorfigineqarasuartarnissaat Naalakkersuisunut
suliakkiissutigisariaqarnersoq Inatsisartuni oqallisigineqassasoq.